

Pravila konkursa „Iskra budućnosti“ 2026

Kao društveno odgovorna kompanija, Wiener osiguranje VIG a.d. kontinuirano ulaže u inicijative koje doprinose razvoju zajednice, jačanju znanja i stvaranju sigurnijeg i održivijeg društva. Posebnu pažnju posvećujemo djeci i mladima, prepoznajući njihovu ključnu ulogu u oblikovanju budućnosti Bosne i Hercegovine. U skladu s tim opredjeljenjem, Wiener osiguranje VIG a.d. raspisuje konkurs „Iskra budućnosti“ 2026, s ciljem podrške projektima koji kroz edukaciju, društveno korisne aktivnosti i inovativne pristupe doprinose razvoju finansijske pismenosti, zaštiti životne sredine i jačanju društvene odgovornosti. Konkurs predstavlja dio dugoročnog nastojanja kompanije da, zajedno s partnerima iz zajednice, podstakne pozitivne promjene i pruži podršku inicijativama koje imaju stvaran i mjerljiv društveni uticaj.

1. PREDMET I CILJEVI KONKURSA

Predmet konkursa „Iskra budućnosti“ je dodjela novčanih sredstava za projekte finansijske pismenosti, očuvanja životne sredine, te društvene odgovornosti u pogledu dobrobiti, razvoja, jednakosti, sigurnosti i zdravlja djece i mladih.

Konkurs „Iskra budućnosti“ poziva na projekte koji doprinose izgradnji održivog društva kroz edukaciju i razvoj finansijske pismenosti, ekološke svijesti i društvene odgovornosti, s posebnim fokusom na djecu i mlade u Bosni i Hercegovini. Projekti treba da promovišu dobrobit, razvoj, jednakost, sigurnost i zdravlje, te podstiču odgovorno ponašanje i aktivno učešće djece i mladih u zajednici.

Finansijska pismenost predstavlja jednu od ključnih životnih vještina jer omogućava donošenje odgovornih finansijskih odluka, smanjuje rizik od socijalne nesigurnosti i doprinosi dugoročnoj ekonomskoj stabilnosti. Učenje osnovnih finansijskih pojmova od najranijeg uzrasta ima značajan uticaj na buduću finansijsku dobrobit djece i mladih te je važno pravovremeno ih usmjeravati ka odgovornom odnosu prema novcu.

Ekološka odgovornost je neophodna za očuvanje prirodnih resursa i smanjenje negativnog uticaja ljudskih aktivnosti na životnu sredinu. Razvijanje svijesti o zaštiti okoliša, racionalnom korištenju resursa i odgovornom upravljanju otpadom doprinosi održivom razvoju zajednice. Edukacija djece i mladih u ovoj oblasti predstavlja ulaganje u dugoročnu zaštitu životne sredine.

Društvena odgovornost podrazumijeva promovisanje jednakosti, sigurnosti i zdravlja, kao i razvoj svijesti o važnosti međusobnog poštovanja, solidarnosti i odgovornog ponašanja u zajednici. Kroz edukativne i društveno korisne projekte djeca i mladi razvijaju socijalne vještine i osjećaj odgovornosti prema sebi i drugima.

2. PRIHVATLJIVI PRIJAVITELJI

Na konkurs se mogu prijaviti organizacije civilnog društva, uključujući udruženja, umjetničke organizacije i neprofitne ustanove, čije su aktivnosti usmjerene ka opštoj dobrobiti i unapređenju kvaliteta života djece i mladih u zajednici. Pravo učešća imaju i ustanove poput vrtića, škola, fakulteta, biblioteka te drugih ustanova i organizacija koje rade u oblasti dobrobiti djece i mladih.

3. USLOVI UČEŠĆA I KRITERIJUMI

Prijavitelj mora biti pravno registrovan kod nadležne institucije u Bosni i Hercegovini i imati sjedište na teritoriji Bosne i Hercegovine. Svaki prijavitelj može podnijeti prijavu za jedan projekat.

Projekat se prijavljuje isključivo na zvaničnom obrascu Organizatora, u kojem je potrebno jasno i konkretno navesti planirane aktivnosti, finansijski plan, te planirani period realizacije projekta, uključujući mjesec početka i mjesec završetka aktivnosti.

Projekti moraju biti realizovani najkasnije do 30.11.2026. godine. Prilikom odabira projekata Organizator će voditi računa o kvalitetu prijavljenih projekata, njihovom društvenom značaju i njihove vidljivosti u javnosti.

U prijavi je potrebno opisati na koji način će projekat i njegove aktivnosti biti predstavljeni javnosti, uključujući plan samostalne promocije projekta od strane prijavitelja (putem društvenih mreža, lokalnih medija i sl.), te mogućnosti saradnje sa Organizatorom u promociji projekta u javnosti. Dobitnici sredstava su dužni aktivno učestvovati u promociji projekta i njegovih aktivnosti, kako bi postigli što veći društveni uticaj i vidljivost rezultata.

Projekti koji uključuju direktan rad sa djecom i mladima moraju se realizovati u skladu sa važećim propisima o zaštiti djece i sigurnosti učesnika.

Nepotpune i/ili neuredno popunjene prijave neće se razmatrati.

4. IZNOS FINANSIRANJA I KORIŠTENJE SREDSTAVA

Traženi iznos sredstava po pojedinačnom projektu ne može biti manji od 1.000,00 KM niti veći od 5.000,00 KM. Prijavitelj u prijavi predlaže iznos sredstava u skladu s finansijskim planom, dok Organizator zadržava pravo da odobri puni ili djelimični iznos traženih sredstava.

Organizator samostalno odlučuje o broju projekata koji će biti finansirani i ukupnom iznosu sredstava. Odobrena sredstva moraju biti iskorištena isključivo za namjene navedene u prijavi. Ukoliko prijavitelj iz bilo kojeg razloga ne bude u mogućnosti realizirati projekat, sredstva ne budu iskorištena u skladu s ugovorom, dostavljanja netačnih informacija ili neizvršavanja projektnih obaveza, prijavitelj je obavezan vratiti neiskorištena ili nepravilno utrošena sredstva Organizatoru, uvećana za zakonsku zateznu kamatu.

Organizator zadržava pravo da tokom realizacije projekta i nakon njegovog završetka zahtijeva finansijsku i drugu dokumentaciju kojom se dokazuje namjensko korištenje sredstava, te da izvrši kontrolu i reviziju projekta. Dobitnici sredstava ne smiju prenijeti ili ustupiti svoja prava i potraživanja iz ovog konkursa na treća lica bez prethodne pisane saglasnosti Organizatora.

Organizator može projekte i njihove aktivnosti komunicirati i promovisati fazno, u skladu s dinamikom njihove realizacije tokom godine.

5. NAČIN PRIJAVE

Projekti se prijavljuju putem zvaničnog prijavnog obrasca koji je dostupan na internet stranici Organizatora i ispunjava se u PDF formatu. Popunjena prijava dostavlja se elektronskim putem na e-mail adresu iskrabuducnosti@wiener.ba.

Naknadne izmjene, dopune ili ponovno slanje prijave nisu moguće. Uz popunjeni obrazac obavezno je priložiti fotografiju, ilustraciju ili logotip projekta na koje prijavitelj ima pravo korištenja. Prijave koje sadrže materijale preuzete s interneta bez odgovarajućih prava korištenja bit će isključene iz konkursa.

6. ROKOVI, IZBOR I OBAVJEŠTAVANJE

Konkurs je otvoren od 12.02.2026. do 12.03.2026. godine do 24:00 sata. Prijave zaprimljene nakon isteka roka neće se razmatrati.

Odabir projekata bit će izvršen najkasnije do 06.04.2026. godine. Prijavitelji čiji su projekti odabrani bit će o tome obaviješteni pisanim putem, nakon čega će s Organizatorom sklopiti ugovor o dodjeli finansijskih sredstava. Prijavitelji koji ne budu kontaktirani mogu smatrati da njihov projekat nije odabran za dodjelu sredstava. Podnošenjem prijave učesnici daju saglasnost za objavu osnovnih podataka o projektu na internet stranici wiener.ba, kao i za promociju projekta i projektnih aktivnosti u javnosti i na društvenim mrežama od strane Wiener osiguranja VIG.

Jednom podnesena prijava smatra se konačnom i potpunom te se nakon isteka roka za prijavu ne može mijenjati, dopunjavati niti korigovati. Organizator konkursa neće razmatrati naknadno dostavljenu dokumentaciju niti zahtjeve za izmjenu ili dopunu već podnesene prijave.

7. AUTORSKA PRAVA I PROMOCIJE

Prijavitelj ustupa Organizatoru neekskluzivno, besplatno i vremenski neograničeno pravo korištenja dostavljenih materijala u svrhu promocije konkursa i projekata (internet stranica, društvene mreže, štampani i elektronski promotivni materijali).

Autorska prava na materijale ostaju prijavitelju odnosno autoru, osim ako se ugovorom o dodjeli sredstava ne ugovori drugačije.

U slučaju da se utvrdi da prijavitelj nije imao pravo koristiti dostavljene materijale, Organizator zadržava pravo diskvalifikacije projekta ili raskida ugovora i zahtijeva za naknadu štete.

8. ZAŠTITA LIČNIH PODATAKA

Podnošenjem prijave na Konkurs, prijavitelj potvrđuje da je upoznat da Organizator obrađuje lične podatke koji su sadržani u prijavi i pratećoj dokumentaciji, isključivo u svrhu provođenja konkursa, izbora projekata, zaključivanja ugovora, praćenja realizacije projekata i promocije odobrenih projekata.

Organizator može objaviti osnovne podatke o odobrenim projektima (naziv projekta, naziv prijavitelja, mjesto realizacije, opis projekta i iznos dodijeljenih sredstava) na svojoj internet stranici i u promotivnim materijalima. Ako projekat uključuje obradu podataka djece ili objavu fotografija/video-materijala na kojima se nalaze maloljetne osobe, prijavitelj je dužan obezbijediti prethodnu pisanu saglasnost roditelja ili zakonskih staratelja i snosi punu odgovornost za zakonitost takve obrade.

Lični podaci će se čuvati u skladu sa internim aktima Organizatora, osim ako važeći propisi ne nalažu drugačije. Prijavitelji imaju pravo na pristup, ispravku i brisanje svojih podataka, kao i druga prava u skladu sa važećim propisima o zaštiti ličnih podataka.

U slučaju potrebe, Organizator će od prijavitelja moći zahtijevati da se zaključi ugovor o obradi podataka, a ukoliko prijavitelj odbije zaključenje takvog ugovora koji je u skladu sa važećim propisima, Organizator će moći odbiti isplatu sredstava ili će moći tražiti povrat istih.

Kontakt za pitanja u vezi zaštite ličnih podataka: zastitapodataka@wiener.ba.

9. POSLOVNA TAJNA I POVJERLJIVOST PODATAKA

Sve informacije, podaci, dokumentacija, finansijski planovi, projektne ideje, metodologije rada, kao i drugi materijali koje strane razmijene u okviru konkursa i realizacije projekta, smatraju se poslovnom tajnom i povjerljivim informacijama.

Organizator i dobitnik sredstava obavezuju se da takve informacije neće učiniti dostupnim trećim licima bez prethodne pisane saglasnosti druge strane, osim u slučajevima kada je to neophodno radi provođenja konkursa, realizacije projekta, zakonskih obaveza ili postupanja pred nadležnim organima.

Organizator zadržava pravo da od dobitnika sredstava zahtijeva potpisivanje posebnog ugovora o povjerljivosti (NDA) prije isplate sredstava ili tokom realizacije projekta.

Ukoliko dobitnik sredstava odbije potpisivanje ugovora o povjerljivosti ili prekrši njegove odredbe, Organizator ima pravo:

- obustaviti dalju isplatu sredstava,
- raskinuti ugovor o dodjeli sredstava, i
- zahtijevati povrat već isplaćenih sredstava, u cjelosti ili djelimično, zajedno sa zakonskom zateznom kamatom.

Obaveza čuvanja povjerljivih informacija ostaje na snazi i nakon završetka konkursa i realizacije projekta.

10. IZVJEŠTAVANJE O REALIZACIJI PROJEKTA

Dobitnici sredstava dužni su dostaviti izvještaj o realizaciji projekta u roku koji će biti definisan ugovorom.

11. IZMJENE I OBUSTAVA KONKURSA

Organizator zadržava pravo da u bilo kojem trenutku izmijeni pravila konkursa, produži rok za prijavu ili u potpunosti poništi konkurs, bez obaveze naknade bilo kakve štete prijaviteljima.

12. MJERODAVNO PRAVO I NADLEŽNOST SUDA

Na konkurs i sve odnose koji iz njega proisteknu primjenjuje se pravo Bosne i Hercegovine.

Za rješavanje eventualnih sporova nadležan je stvarno nadležni sud u Banjoj Luci.

13. ZAVRŠNE ODREDBE

Organizator zadržava pravo tumačenja ovih Pravila.

Učešćem u Konkursu smatra se da su prijavitelji u potpunosti upoznati sa sadržajem ovih Pravila i da ih prihvataju u cijelosti.

Organizator ne snosi odgovornost za eventualnu štetu koja može nastati prijaviteljima ili trećim licima u vezi sa učešćem u Konkursu ili realizacijom projekata, osim u slučaju namjere ili grube nepažnje Organizatora.

Ova Pravila stupaju na snagu danom objave na internet stranici Organizatora.